

魏書宗室傳注

魏書宗室傳注卷五

上虞 羅 振玉

太武五王列傳第六

魏書十八

晉王

東平王

臨淮王

廣陽王

南安王

太武皇帝十一男賀皇后生景穆皇帝越椒房生晉王伏羅

舒椒房生東平王翰弗椒房生臨淮王譚伏房椒生楚王當從北史

作廣陽王

建閭石昭儀生南安王余其小兒貓兒虎頭龍頭並闕母

氏皆早薨

世祖紀太延二年四月甲申皇子小兒苗兒並薨不作貓兒高宗紀虎頭龍頭薨於興光元年八月乙丑

無傳

晉王伏羅眞君三年封

世祖紀受封在眞君三年十月己卯

加車騎大將軍後督高平

涼州諸軍討吐谷渾慕利延軍至樂都謂諸將曰若從正道

恐軍聲先振必當遠遁若潛軍出其非意此鄧艾擒蜀之計也諸將咸難之伏羅曰夫將軍制勝萬里擇利專之可也遂間道行至大母橋慕利延衆驚奔白蘭慕利延子拾寅走阿曲斬首五千餘級降其一萬餘落

世祖紀事在太平眞君五年

八年薨無子國除

東平王翰眞君三年封秦王拜侍中中軍大將軍參典都曹事忠貞雅正百僚憚之太傅高允以翰年少作諸侯箴以遺之翰覽之大悅後鎮枹罕以信惠撫衆羌戎敬服改封東平王

世祖紀

翰受封在眞君三年十月己卯改封在正平元年十二月丁丑

世祖崩諸大臣等議欲立翰而中常侍

宗愛與翰不協矯太后令立南安王余遂殺翰

子道符襲爵中軍大將軍顯祖踐阼拜長安鎮都大將軍興

元年謀反司馬段太陽討斬之傳首京師

顯祖紀皇興元年道符司馬段太陽攻道符斬之傳首京師道符兄弟皆

伏誅是道符有兄弟同反傳失書

臨淮王譚真君三年封燕王拜侍中參都曹事後改封臨淮

王

世祖紀改封在正平元年十二月丁丑

世祖南討授中軍大將軍先是劉義隆以鄒山

險固有榮胡家乃積糧爲守禦之備譚率衆攻之獲米三十

萬以供軍儲義隆恃准之阻素不設備譚造筏數十潛軍而

濟賊衆驚潰遂斬其將胡崇賊首萬餘級

世祖紀太平真君十二月車駕至淮詔刈崔葦作筏數萬而濟義隆肝胎

守將臧質閉門拒守將軍胡崇之率衆二萬援肝胎燕王譚大破之梟崇之等斬首萬餘級崇之傳作崇島夷劉義隆傳亦作崇之但作斬崇之等及他首數千級不作萬餘級

薨諡宣王

高宗紀興安元年十

一月癸未薨

子提襲爲梁州刺史以貪縱削除加罰徙配北鎮

高祖紀提配北鎮在太和十二年十一月

久之提子員外郎穎免冠請解所居官代父邊戍高祖不許

後詔提從駕南伐至洛陽參定遷都之議尋卒以預參遷都

功追封長鄉縣侯世宗時贈雍州刺史諡曰懿

提子昌字法顯好文學居父母喪哀號孺慕悲感行人世宗時復封臨淮王未拜而薨贈齊州刺史諡曰康王追封濟南王

子彧字文若

元彧墓誌作字文舉

紹封彧少有才學時譽甚美侍中崔光見

彧退而謂人曰黑頭三公當此人也少與從兄安豐王延明

中山王熙並以宗室博古文學齊名時人莫能定其優劣尙

書郎范陽盧道將

北史作盧思道

謂吏部清河崔休曰三人才學雖無

優劣然安豐少於造次中山皂白太多未若濟南風流沉雅

時人爲之語曰三王楚琳琅未若濟南備員方彧姿制閑裕

吐發流靡

北史元顥本作美

琅邪王誦有名人也見之未嘗不心醉忘疲

拜前軍將軍中書侍郎奏郊廟歌辭時稱其美除給事黃門
侍郎彧本名亮字仕明時侍中穆紹與彧同署避紹父諱啟
求改名詔曰仕明風神運吐常自以比荀文若可名彧以取
定體相倫之美彧求復本封詔許復封臨淮寄食相州魏郡
又長兼御史中尉彧以爲倫敍得之不謝領軍于忠忿言之
朝廷曰臨淮雖復風流可觀而無骨鯁之操中尉之任恐非
所堪遂去威儀單車而還朝流爲之歎息累遷侍中衛將軍
左光祿大夫兼尙書左僕射攝選

肅宗紀彧復本封在延昌四年壬辰正光五年三月
沃野鎮人破落汗拔陵聚衆反詔彧爲鎮軍假征北

將軍都督北征諸軍事以討之五月彧敗於五原削除官爵七月戊午復本封孝昌元年正月徐州刺史元法僧據城反
詔彧及尙書李憲爲都督以討之十二月以彧爲征南大將軍率衆討魯陽蠻二年八月丙子以彧爲儀同三司傳皆失

書
是時蕭衍遣將圍逼溫湯進彧以本官爲東道行臺會尔

朱榮入洛殺害元氏彧撫膺慟哭遂奔蕭衍

孝莊紀彧奔蕭衍在建義元年四月其返國在七月

遣其舍人陳建孫迎接并觀彧爲人建孫還報稱彧風神閑
儁衍亦先聞名深相器待見彧於樂遊園因設宴樂彧聞樂
聲歔歔涕淚交下悲感傍人衍爲之不樂自前後奔叛皆希
旨稱魏爲僞唯彧上表啟常云魏臨淮王衍體彧雅性不以
爲責及知莊帝踐阼彧以母老請還辭旨懇切衍惜其人才
又難違其意遣其僕射徐勉私勸彧曰昔王陵在漢姜維相
蜀在所成名何必本土彧曰死猶願北況於生也衍乃以禮
遣彧性至孝事父母盡禮自經違離不進酒肉容貌憔悴見
者傷之累除位尙書令大司馬兼祿尙書莊帝追崇武宣王
爲文穆皇帝廟號肅祖母李妃爲文穆皇后將遷神主於太
廟以高祖爲伯考彧表諫曰漢祖創業香街有太上之廟光

武中興南頓立春陵之寢元帝之於光武疏爲絕服猶尙身
奉子道入繼大宗高祖之於聖躬親實猶子陛下旣纂洪緒
豈宜加伯考之名且漢宣之繼孝昭斯乃上後叔祖豈忘宗
承考妣蓋以大義斯奪及金德將興宣王受寄自茲而降世
秉威權景王意存毀冕文王心規裂冠雖祭則魏主而權歸
晉室昆之與季實傾曹氏且子元宣王冢庸文王成其大業
故晉武繼文祖宣景王有伯考之稱以今類古恐或非儔又
臣子一例義彰舊典禘祫失序著譏前經高祖德溢寰中道
超無外肅祖雖勲格宇宙猶曾奉贄稱臣穆皇后稟德坤元
復將配享乾位此乃君臣並筵嫂叔同室歷觀墳籍未有其
事時莊帝意銳朝臣無敢言者唯或與吏部尙書李神儁並

有表聞詔報曰文穆皇帝勲格四表道邁百王是用考循舊軌恭上尊號王表云漢太上於香街南頓於舂陵漢高不因瓜瓞之緒光武又無世及之德皆身受符命不由父祖別廟異寢於理何差文穆皇帝天睠人宅歷數有歸朕忝承下武遂主神器既帝業有統漢氏非倫若以昔況今不當移寢則魏太祖晉景帝雖王跡已顯皆以人臣而終豈得與餘帝別廟有闕餘序疑漢郡國立廟者欲尊高祖之德使饗遍天下非關太廟神主獨在外祠薦漢宣之父亦非勲德所出雖不追尊不亦可乎伯考之名自是尊卑之稱何必準古而言非類也復云君臣同列嫂叔共室當以文穆皇帝昔遂臣道以此爲疑禮天子元子猶士禘祫豈不得同室乎且晉文景共

爲一代議者云世限七主無定數昭穆旣同明有共室之理
禮旣有祔嫂叔何嫌禮士祖禰一廟豈無婦舅共室也若專
以共室爲疑容可更議遷毀莊帝旣逼諸妹之請此辭意黃
門侍郎常景中書侍郎邢子才所贊成也又追尊兄彭城王
爲孝宣皇帝彧又面諫曰陛下中興意欲憲章前古作而不
法後世何觀歷尋書籍未有其事願割友于之情使名器無
爽帝不從及神主入廟復勅百官悉陪從一依乘輿之式彧
上表以爲爰自中古迄於下葉崇尚君親褒明功懿乃有皇
號終無帝名今若去帝直留皇名求之古義少有依準又不
納尔朱榮死除彧司徒公尔朱世隆率部北叛詔彧防河陰
及尔朱兆率衆奄至彧出東掖門爲賊所獲見兆辭色不屈

爲羣胡所毆薨

孝莊紀 歲除司徒公在永安三年十一月乙亥爲尔朱兆所殺在十二月甲辰

出帝贈太師太尉公雍

州刺史

墓誌 詔贈使持節時中太保領太尉公錄尚書事大將軍都督定相二州諸軍事定州刺史北史作孝武帝末贈大將軍太師太尉公錄尚書事諡曰文懿

或美風韻善

進止衣冠之下雅有容則博覽羣書不爲章句所著文藻雖多亡失猶有傳於世者然居官不能清白所進舉止於親婭爲識者所譏無子

弟孝友少有時譽襲爵淮陽王累遷滄州刺史爲政溫和好行小惠不能清白而無所侵犯百姓亦以此便之孝靜帝宴齊文襄王於華林園孝友因醉自譽又云陛下許賜臣能帝笑曰朕恒聞王自道清文襄曰臨淮王雅旨舍罪於是君臣俱笑而不罪孝友明於政理嘗奏表曰令制百家爲黨族二十家爲閭五家爲比隣百家之內有帥二十五徵發皆免苦

樂不均羊少狼多復有蠶食此之爲弊久矣京邑諸坊或七八百家唯一里正二史庶事無闕而況外州乎請依舊置三正之名不改而百家爲四閭閭二比計族省十二丁得十二疋貲絹略計見管之戶應二萬餘族一歲出貲絹二十四萬疋十五丁出一番兵計得一萬六千兵此富國安人之道也

古諸侯娶九女士有一妻二妾

齊書元孝友傳作一妻一妾

晉令諸王置妾八人

郡公侯妾六人官品令第一第二品有四妾第三第四有三妾第五第六有二妾第七第八有一妾所以陰教聿脩繼嗣有廣廣繼嗣孝也脩陰教禮也而聖朝忽棄此數由來漸久將相多尙公主王侯亦娶后族故無妾媵習以爲常婦人多幸生逢今世舉朝略是無妾天下殆皆一妻設令人彊志廣

娶則家道離索身事迍邐內外親知共相嗤怪凡今之人通

無準節父母嫁女則教之以妒姑姊逢迎必相勸以忌持制

夫爲婦德以能妒爲女工自云受人欺

齊書作自云不受人欺此奪不字

畏他笑我

王公猶自一心已下何敢二意夫妒忌之心生則妻妾之禮

廢妻妾之禮廢則姦淫之兆興斯臣之所以毒恨者也請以

王公第一品娶八通妻以備九女稱事二品備七三品四品

備五五品六品則一妻二妾限以一周悉令充數若不充數

及待妾非禮使妻妒加捶撻免所居官其妻無子而不娶妾

斯則自絕無以血食祖父請科不孝之罪離遣其妻臣之赤

心義唯家國欲使吉凶無不合禮貴賤各有其宜省人帥以

出兵丁立倉儲以豐穀食設賞格以擒姦盜行典令以示朝

章庶使足食足兵人信之矣又冒申妻妾之數正欲使王侯將相功臣子弟苗胤滿朝傳祚無窮此臣之志也詔付有司議奏不同孝友又言今人生爲阜隸葬擬王侯存沒異途無復節制崇壯丘壠盛飾祭儀隣里相榮稱爲至孝又夫婦之始王化所先共食合瓢足以成禮而今之富者彌奢同牢之設甚於祭粢累魚成山山有林木林木之上鸞鳳斯存徒有煩勞終成委棄仰惟天意其或不然請自茲以後若婚葬過

北史及齊書作若婚葬過禮者此奪禮字

以違旨論官司不加糾劾卽與同罪孝友在尹

積年以法自守甚著聲稱然性無骨鯁善事權勢爲正直者

所議齊受禪爵例降

北史天保初準例降爵封臨淮縣公拜光祿大夫二年冬被詔入晉陽宮出與元暉業同被害

昌弟孚字秀和少有令譽侍中游肇并州刺史高聰司徒崔

光等見孚咸曰此子當準的人物恨無徒衰暮不及見耳累遷兼尙書右丞靈太后臨朝宦者干政孚乃總括古今名妃賢后凡爲四卷奏之遷左丞蠕蠕主阿那瓌旣得返國其人
大饑相率入塞阿那瓌上表請臺賑給詔孚爲北道行臺詣彼賑恤孚陳便宜表曰衣服之人未嘗粒食宜從俗因利拯其所無昔漢建武中單于歟塞時轉河東米糒二萬五千斛牛羊三萬六千頭以給之斯卽前代和戎撫新柔遠之長策也乞以牝牛產羊餬其口命且畜牧繁息是其所便毛血之利惠兼衣食又尙書奏云如其仍住七州隨寬置之臣謂人情戀本寧肯徙內若依臣請給賑雜畜愛本重鄉必還舊土如其不然禁留益損假令逼徙事非久計何者人面獸心去

留難測既易水草痾恙將多憂愁致困死亡必甚兼其餘類
尙在沙磧脫出狂悖翻歸舊巢必殘掠邑里遺毒百姓亂而
方塞未若杜其未萌又貿遷起於上古交易行於中世漢與
胡通亦立關市今北人阻饑命懸溝壑公給之外必求市易
彼若願求宜見聽許又云營大者不計小名圖遠者弗拘近
利雖戎狄衰盛歷代不同叛服之情略可論討周之北伐僅
獲中規漢氏外攘裁收下策昔在代京恒爲重備將帥勞止
甲士疲力前世苦之計未能致今天祚大魏亂亡在彼朝廷
垂天覆之恩廓大造之德鳩其散亡禮送令返宜因此時善
思遠策竊以理雖萬變可以一觀來事雖懸易以往卜昔漢
宣之世呼韓歟塞漢遣董忠韓昌領邊郡士馬送出朔方因

留衛助又光武時亦令中郎將段彬置安集掾史隨單于所
在參察動靜斯皆守吉之元龜安邊之勝策計今朝廷成功
不減曩時蠕蠕國敝亦同疇日宜準昔成謨略依舊事借其
所閑地聽使田牧粗置官屬示相慰撫嚴戒邊兵以見保衛
馭以寬仁縻以久策使親不至矯詐疎不容叛反今北鎮諸
將舊常云一人代外邏因令防察所謂天子有道守在四夷
者也又云先人有奪人之心待降如受彊敵武非專外亦以
防內若從處分割配諸州鎮遼遠非轉輸可到悔叛之情變
起難測又居人畜業布在原野戎夷性貪見則思盜防彼肅
此少兵不堪渾流之際易相干犯驅之還本未必樂去配州
內徙復不肯從旣其如此爲費必大朝廷不許孚持白虎幡